

UNOCA ta uni como patrocinador pa Carnaval 71

DEN un acto reciente, SMAC, representa pa su presidente, Darren van Ommeren y UNOCA, lidera pa Marvin Odor, a firma un acuerdo di co-financiacion pa Carnaval 71. Cu e convenio aki, UNOCA ta converti oficialmente den un patrocinador nobo p'e evento asina importante di e cultura di Aruba.

Presidente di UNOCA, Marvin Odor, a destaca cu e organizacion ta comprometi cu e sosten n'e eventonan di gran relevancia p'e comunidad, manera ta Carnaval.

Segun Odor, "e fondonan destina n'e eventonan aki mester di un impulso adicional, un mayor atencion y respaldo, pa por hiba Carnaval di Aruba na un nivel mas halto." E colaboracion aki ta wordo mira como un paso positivo pa sigura cu Carnaval continua ta un celebracion vibrante y exitoso, reforsando e importancia di e cultura local.

Di su parti, e presidente di SMAC, Darren van Ommeren, a expresa su gradicimento p'e sosten ricibi di UNOCA. Ta un honor conta cu e colaboracion di UNOCA den e evento aki, specialmente den e aniversario significativo aki, e di dies di SMAC. Su sosten ta reafirma e compromiso di hopi organizacion cu e preservacion y e impulso di nos tradicionnan, segun e presidente di SMAC.

E acuerdo aki ta marca un desaroyo importante pa SMAC, cu ta celebra su di dos lustro di esfuerzo y dedicacion na Carnaval di Aruba.

E union cu UNOCA no solamente ta representa un respaldo economico, sino tambe un voto di confiansa p'e futuro di Carnaval, sigurando su crecimiento y expansion. E comunidad di Aruba por spera un edicion ainda mas grandioso di Carnaval, danki n'e aliansa strategico aki cu ta reforsa e laso entre e organisacionnan y cultura local.

